

GOD I GUTPELA

“Tasol God i soim Em i laikim yumi tru olsem, taim yumi stap sinman yet, Kraisti bin i dai bilong kisim bek yumi.” (Rom 5:8)

God i bin wokim olgeta samting.

“Long stat bilong olgeta samting, God i bin wokim skai na graun.” (Stat 1:1)

God i bin wokim yumi.

“Yu bin wokim olgeta hap bilong bodi bilong mi. Yu wokim mi olgeta insait long bel bilong mama...Yu lukim mi taim mama i no karim mi yet...”
(Buk Song 139:13, 16a)

God i bin laikim yumi tru pastaim.

“Pasin bilong laikim tru i stap olsem. I no olsem yumi bin laikim tru God. Tasol Em i bin laikim tru yumi, na Em i bin salim Pikinini Man bilong Em long kamap Man i kolim bel hat bilong God long yumi long ol sin bilong yumi...Yumi laikim Em tru bikos Em i bin laikim yumi tru pastaim.”
(1 Jon 4:10, 19)

MAN I PUNDAUN PINIS LONG SIN

“Long wanem, pe bilong sin em i dai, tasol presen bilong God Em i givim nating long yumi em laip i stap gut oltaim oltaim. Na dispela i kam long wok bilong Jisas Kraist, Bikpela bilong yumi.” (Rom 6:23)

Olgeta manmeri i pundaun pinis long sin.

“Olsem na long wanpela man tasol sin i bin kamap long dispela graun, na sin i bringim i dai i kam. Long dispela tasol dai i bin kamap long olgeta man, long wanem, olgeta man i bin mekim sin.” (Rom 5:12)

Yumi olgeta i save brukim lo.

“Wanem man i mekim sin, em i brukim lo tu, bikos sin em i pasin bilong brukim lo.”
(1 Jon 3:4)
“Long wanem, man i save bihainim olgeta lo, na em i pundaun long wanpela hap tasol, em i gat asua long olgeta lo.” (Jems 2:10)

Yumi no inap kisim bek yumi yet.

“Long wanem, long marimari Em i bin kisim bek yupela pinis long bilip tru. Na dispela em i no samting yupela yet i bin mekim. Nogat. God i givim nating long yupela. Dispela i no kamap long ol wok bilong yupela. Nogat. Nogut wanpela man i ken litimapim nem bilong em yet.” (Efesas 2:8-9)

Yumi no ken tok olsem, “Mi no gat sin.”

“Sapos yumi tok, yumi no gat sin, yumi giamanim yumi yet, na pasin i tru i no stap insait long yumi.” (1 Jon 1:8)

Sin i gat kot bilong en.

“Man i bilip long Em, em i no gat kot. Tasol man i no bilip long Em, em i lus pinis long kot, bikos em i no bin bilip long nem bilong dispela wanpela Pikinini Man tru bilong God.” (Jon 3:18)

Olgeta man i stap aninit long kot.

“Na mi lukim ol daiman, ol man nating wantaim ol man i gat nem, ol i sanap long pes bilong God, na Em i opim sampela buk. Na Em i opim narapela buk, dispela buk em i buk bilong laip. Na Em i kotim ol daiman long ol rait i stap long ol dispela buk, long ol pasin ol i save mekim...Na sapos Em i no lukim nem bilong wanpela man long ol rait i stap long buk bilong laip, orait Em i tromoi dispela man i go long Bikpela Hul i gat Paia.”
(Revelesen 20:12, 15)

KRAIST I KAM BILONG KISIM BEK YUMI

“Tasol sapos yumi wokabaut long lait, olsem Em i stap long lait, yumi stap wanbel wantaim narapela. Na blut bilong Jisas Kraist, Pikinini Man bilong Em, i klinim yumi long olgeta sin.” (1 Jon 1:7)

Jisas i no bin mekim sin.

“Na yupela i save olsem, Kraist i bin kamap ples klia bilong tekewe ol sin bilong yumi, na sin i no stap insait long Em.” (1 Jon 3:5)

Em i laik kisim bek olgeta manmeri.

“Long wanem, Pikinini Man bilong man i kam bilong painim na kisim bek man i lus pinis.” (Luk 19:10)

Yumi mas givim baksait long sin na bilip long Bikpela Jisas Kraist.

“Mi save tokaut klia long ol Ju na ol Grik wantaim, long ol i mas tanim bel i go long God na bilip tru i go long Bikpela bilong yumi Jisas Kraist.”
(Aposel 20:21)

Yumi no ken mekim antap long skin tasol, yumi mas mekim wantaim bel na tingting.

“Em i olsem, sapos yu tok yes long maus bilong yu olsem, Jisas Em i Bikpela, na sapos yu bilip long bel bilong yu long God i bin kirapim Em long i dai, orait bai God i kisim bek yu. Long wanem, long bel man i save bilip na i kamap stretpela, na long maus, em i save autim bilip na God i kisim bek em.” (Rom 10:9-10)

God em i stap redi long kisim bek yumi!

“Long wanem, God i bin laikim tru ol manmeri bilong dispela graun. Olsem na Em i bin givim dispela wanpela, Em i Pikinini Man tru bilong Em, bai olgeta man i bilip long Em, ol i no ken lus. Nogat. Tasol ol i kisim laip i stap gut oltaim oltaim.” (Jon 3:16)
“Long wanem, man i singaut long nem bilong Bikpela, bai God i kisim bek em.”
(Rom 10:13)

NAU BAI YUMI MEKIM WANEM?

“Sapos yumi autim ol sin bilong yumi, God Em inap long yumi ken bilip long En, na Em i stret olgeta bilong lusim ol sin bilong yumi, na bilong klinim yumi long olgeta pasin i no stret.” (1 Jon 1:9)

Sapos yu laik kam klostu long God, yu mas save olsem:

1. Yumi olgeta i stap sinman, tasol Kraist i bin laikim yumi.

“Tasol God i soim Em i laikim yumi tru olsem, taim yumi stap sinman yet, Kraist i bin i dai bilong kisim bek yumi.” (Rom 5:8)

2. Pe bilong sin em i dai, tasol Kraist i bin i dai na kirap bek bilong kisim bek yumi.

“Long wanem, pe bilong sin em i dai, tasol presen bilong God Em i givim nating long yumi em laip i stap gut oltaim oltaim. Na dispela i kam long wok bilong Jisas Kraist, Bikpela bilong yumi.” (Rom 6:23)

3. No gat narapela inap kisim bek yumi, em Bikpela Jisas wanpela tasol.

“Na rot bilong kisim bek man i no i stap long narapela. Long wanem, i no gat narapela nem aninit long heven na God i bin givim namel long ol man, em i bilong kisim bek yumi. Nogat.” (Aposel 4:12)

4. Jisas i tok, “Mi yet Mi rot,” na i no gat narapela rot i go long Papa God.

“Jisas i tokim em, Mi yet Mi rot, na Mi as bilong tok tru, na Mi as bilong laip. I no gat wanpela man inap kamap long Papa long narapela rot. Nogat. Long Mi tasol. (Jon 14:6)

5. Bikpela i les long yumi i dai na i go long hel. Em i laik kisim bek yumi!

“Bikpela i no slek long kamapim promis bilong Em, olsem sampela man i tingim pasin bilong slek long wok. Tasol Em i no save les kwik long yumi, na Em i no laikim wanpela man i mas lus, tasol Em i laikim olgeta man i mas kam long tanim bel.” (2 Pita 3:9)

6. Yumi wan wan mas tanim bel i go long God, na bilip long Kraist!

“Long wanem God i bin laikim tru ol manmeri bilong dispela graun. Olsem na Em i bin givim dispela wanpela, Em i Pikinini Man tru bilong Em, bai olgeta man i bilip long Em ol i no ken lus. Nogat. Tasol ol i kisim laip i stap gut oltaim oltaim.” (Jon 3:16)

Olsem wanem yu wet i stap? Tanim bel na bilip long Kraist tude!

“Harim gut! Nau em i gutpela taim tru. Harim gut! Nau em i de bilong kisim bek man.” (2 Korin 6:2)

“Tru tumas Mi tokim yupela, Man i harim tok bilong Mi, na i bilip long God i bin salim Mi i kam, em i gat laip i stap gut oltaim oltaim. Na em i no inap kamap long kot. Nogat. Tasol em i lusim pinis i dai na em i kamap pinis long laip.” (Jon 5:24)

Sapos yu bin tanim bel na bilip pinis long Kraist, God i laik yu mas save olsem:

Yu kamap Pikinini bilong God pinis!

“Tasol olgeta man i kisim Em, Em i givim namba long ol bai ol i ken kamap ol pikinini man bilong God. Yes, long ol man i bilip long nem bilong Em.” (Jon 1:12)

Yu kamap nupela insait long Kraist!

“Olsem na sapos man i stap insait long Kraist, orait dispela man em i nupela man tru. Ol olpela samting i pinis, na harim, olgeta samting i kamap nupela.” (2 Korin 5:17)

Yu gat laip i stap gut oltaim oltaim!

“Ol dispela samting mi bin raitim long yupela manmeri i bilip long nem bilong Pikinini Man bilong God, [mi raitim olsem] bai yupela i ken save long yupela i gat laip i stap gut oltaim oltaim, na bai yupela i ken bilip long nem bilong Pikinini Man bilong God.” (1 Jon 5:13)

“Ol sipsip bilong Mi i save harim maus bilong Mi, na Mi save long ol, na ol i save bihainim Mi. Na Mi givim ol laip i stap gut oltaim oltaim. Na ol bai i no inap lus olgeta, na i no gat wanpela man inap rausim ol long han bilong Mi.” (Jon 10:27-28)

God i laik yu mas ritim Buk Baibel olgeta de, bai yu ken save moa long God.

“Yupela i olsem nupela pikinini. Olsem na yupela i mas laikim dispela susu i nogat giaman bilong tok bilong God, bai yupela i ken kamap bikpela long dispela.” (1 Pita 2:2)
“Tok bilong Yu i olsem lam bilong helpim mi long wokabaut stret, na i olsem lait bilong soim rot long mi.” (Buk Song 119:105)

God i laik yu mas beten long Em olgeta de na olgeta taim.

“Yupela i no ken wari long wanpela samting, tasol long olgeta samting, yupela i mas tokim God long ol askim bilong yupela na beten wantaim tenkyu. Na bel isi bilong God i kam long Jisas Kraist na i winim olgeta tingting, dispela bai i was gut long bel na tingting bilong yupela.” (Filipai 4:6-7)

God i laik yu mas bung wantaim ol arapela Kristen long wanpela sios i save autim Tok bilong God stret na bihainim Tok bilong God gut, bai yu ken kisim gutpela skul bilong helpim Kristen laip bilong yu.

“Yumi no ken lusim pasin bilong yumi yet long bung wantaim, olsem sampela i save mekim. Tasol yumi mas strongim bel bilong ol arapela bilong yumi. Na yumi mas mekim dispela moa moa yet taim yupela i lukim las de i laik kamap klostu.” (Hibru 10:25)

God i laik yu mas autim gutnius long ol manmeri na givim biknem long Em.

“Yu go bek long haus bilong yu, na telimautim tok long ol bikpela samting God i bin mekim long yu. Na em i lusim ol i go, na long olgeta hap bilong taun, em i autim tok long ol bikpela samting Jisas i bin mekim long em.” (Luk 8:39)